


TS419/4270

11







新兩城先生集卷之十八

東魯新學顏著

墓誌銘

逸菴楊公墓誌銘

按楊公始祖楊二公者避元亂自礪山徙家濟  
寧生子從禮從禮生子敬子敬生慶慶生聰聰  
有子三人瑛琇及公也公諱瓚字文玉童時有  
孝行十六歲而喪親遺貲為二兄者二分之一而  
不及公公一無所問乃自力作楮據者祖殆成



CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
OCT 5 1989

靳兩城先生集卷之十八

東魯靳學顏著

墓誌銘

逸菴楊公墓誌銘

按楊公始祖楊二公者避元亂自礪山徙家濟  
寧生子從禮從禮生子敬子敬生慶慶生聰聰  
有子三人瑛琇及公也公諱瓚字文玉童時有  
孝行十六歲而喪親遺貲焉二兄者二分之而  
不及公公一無所問乃自力作拮据蓄租殆成

哈佛大學漢和  
圖書館珍藏印



鉅室二兄者顧弗什一若也既異業三十年琇  
以官銀被逮妻孥累囚窘矣公自鬻產以償竟  
免於理琇與瑛及妣氏也生而公資之養歿而  
公為治喪具情文瞿瞿懇懇若弗及然即他人  
有急以應之無問䟽屬唯恐後者或有宿負察  
其誠困也則折券不責一文以至掩骼瘞殮非  
以為生也而捐已酬物如甘飴酪此非其性能  
何哉公有四子曰士魁者早卒今其在者士基  
府學生士彥士毅皆州學生三子自相師友修

幹奇氣有霄漢之志固公教誨使然抑語曰植  
穀得穀稗菽得菽公未敷其華而子其啜之實  
乎有一女適邵君楫亦先公卒孫男六曰惟耀  
惟乾惟高惟明惟照惟曙孫女三公生於成化  
己亥正月二十三日卒於嘉靖甲寅三月十二  
日得壽七十有六與其元配周孺人合塋於城  
北先塋之次實五月庚申也塋之前期士基輩  
以狀謁予予往聞北郭弗靖有寇夜突入楊氏  
舍執公士基與諸昆季爭赴公自死矣乃寇



服其誼也釋公以去此豈醴言猥行擇其苦而後蹈者可幾哉矧予又習閑公誼至高者誌其可辭於是銘曰砥如其砥如宰如馮如二靈孔妥寔崇爾祐君子式之曰此逸菴公之墓

處士江公墓誌銘

公諱湖字洞之庚子鄉進士東父也世屬籍濟寧州而隱耀弗宣故弗詳其系次祖福者娶於韓生三子龍鸞鳳龍娶於張是生公公生十三年而喪父踰年母又喪乃怙於韓既長痛其不

逮事父母也而事韓益篤事鸞若其父視其孫若其同胞與其所生鳳卒有遺孤公鞠而翼之為成人公古心一如其貌非其力不食非其家治不以衣足跡不涉城府士大夫憶之一見其面不得櫛沐風雨以沒其身終無他想暇惟招田父詣鄰叟摘蔬剥棗啜醪為歡人亦親之相與共醉不釋去東既舉於鄉東之二子又皆選於庠一日奉卮酒跪壽公且雅勸公城徙公一不為意第曰榜人理舟圉人理駕路雖異繇亦



各能其事也已矣嘉靖三十三年五月一日卒  
距其生之成化二十年八月得壽七十有一葬  
以是年九月二十八日君子謂江氏之後必大  
大必繇公曰不有璞也孰有琮璜不有推輪華  
輅曷從先也不朽其芳必不斲之光於厥後也  
孰謂天乎而非善之右乎銘曰魯翟山其東原  
三十五里州城西江公塋此其與偕

姊張孺人墓誌銘

嗚呼孺人之銘不可已也孺人吾姊也分體均

愛四人焉今姊亡矣吾暨吾弟妹相顧哭焉彷徨  
徨焉於何復得姊哉姊生十八歲是為嘉靖戊  
子而歸張君廷臣君輸粟待銓者濟右室也父  
引禮公者配邵無子乃卜娶侯生君邵嚴甚珍  
其四姜而不樂有君引禮公不敢拂也劉氏者  
引禮公母也潛護君君以成植姊固剛毅有先  
恭人風而甯身憂疾纖弱翫曲當人人意讓言  
至即遜謝及歸澣又不以言以故笞譴不及而  
兩姓終懽以保其夫若躬焉歸七年甲午劉氏



卒姊與君喪之瘠毀蓋重有感云又二年丙申引禮公卒遺產三千金姊與君謀以其二千金散諸姜之家以悅邵而以其一千者資俯仰焉邵果安君而重德姊又十四年己酉始卒明年庚戌侯亦卒喪之如喪劉氏也先是戊申哭其五歲兒順祖吐血損矣辛亥又哭其十一歲兒孝祖壬子又哭我先恭人割痛摧慕無節居常忽忽如不生見履綦彷彿輒涕數行下竟瘵焉以死死之先數日自見恭人與其亾兒痛哉是

耶非耶積思極矣謂何耶然力疾攬鏡其矣其果有知耶其相從耶姊生四十二歲身經五大喪哭子四哭女四今其遺子裕齡六歲其生員許秉女裕宗二歲聘許應元女女長適楊次適曹次適孫皆名門楊衛指揮茂實也姊言慧多筭知書而博觀之瀕危猶啐啐語家政及喪殯纖微事又佯屢霍其兒人從旁讐之曰吾豈霍吾兒者吾故示弗慈彼猶見索也今其兒果不解索嗚呼吾不為斯銘誰知吾姊為張氏



婦難為者兒長解索母不得視吾所為銘亦幸  
有慰於兒也銘曰盱娥蹈波變彼未夫姊嬪作  
母慕母不渝吾哭母未已而又哭姊於姊柩何  
銘姊不死舅氏有言式穀爾子歲月寅其日酉  
姊其藏固而久

南墅許公墓誌銘

嘉靖三十有三年夏五月壬寅塋許公先是正  
月二十六日公卒於鉅野縣張奉集之里第其  
子縣諸生近道匍匐走百四十里以鄉進士張

君狀至濟請靳子銘曰先君負隱德而無有聞  
於當世年未耆死於厥父之疾而未逮養於其  
子其若子何自非乞言君子耀於幽寯托而不  
磨奚及哉狀曰許氏先著跡虞城而世有河患  
國初有許真者任臨清州判官遂避地於鉅  
野安興墓家焉既徙今居真生良良生謙謙生  
奎奎生公公諱珮字天章自號南墅習先世業  
而又力事生作故家用益裕母高早世事繼母  
時若事高也而顧益謹公謙謙不伐尤悅士大



夫士大夫亦咸知有許公者嘉靖戊申 制詔  
內外庶人輸邊者予之官乃授公典膳而實家  
食日侍其父奎翁焉翁年七十八矣老病不時  
作公憂之至廢寢食致疾疾且革猶曰吾其不  
瞑乎吾未歸吾親於土也無何而逝得筭五十  
七爾配曲氏生子男二人守道近道縣諸生孫  
男四曰濟洛滄湘公謹厚者事親教子外無他  
營唯篤宗黨以時施予之即其里之人數百室  
無或忤者公死巷不歌春不相頃其里而致哀

松公是可以觀許公矣松是靳子以其狀詢之  
人人曰許公之行也信然乃為銘曰不虞其憂  
而憂其父之憂焉以死是謂得死子而思光其  
父之死也不文是以將實是以是謂不死嗚呼  
許公封其上而廓其中是唯公之宮爾子而孫  
也其無憂乎而翁

誥封太安人于母孟氏合葬墓誌銘

嘉靖四十有一年八月十一日于母太安人卒  
安人之夫曰主事公諱賢先安人幾年卒而有



志安人有女德而貴葬宜再志禮也時厥子憲  
副君錦奉 璽書兵備洮岷聞訃日夜奔三千  
餘里抵舍伏地哭焉摧毀焉數日始湯飲乃泣  
血述狀屬予志之安人者鉅野人父孟公廷銳  
母曲氏曲氏之始生安人也夢高冠人以盈尺  
玉簪遺焉寤而生安人七歲而曲喪事繼母翟  
婉順甚相安孟公已心竒其女而又善星數好  
相人遍閱里中兒無女匹者一日見主事公與  
語撫而嘆曰吾兒佳壻在是乎乃約為壻及期

以安人歸焉主事公家故貧安人勤力身執勞  
辱之役罔有厭倦色逮事舅坦溪公姑梁氏咸  
安其孝梁氏卒事繼柴氏益謹而室有崔氏者  
妬安人而數譖於柴詬讓日至安人置弗辯乃  
愈益謹已而柴大悔悟舅廉其誠也怒逐崔氏  
遂復和輯如初主事公倜儻多外交安人主家  
政自族姓骨肉僕婢罔不胥悅迄今五十年同  
爨凡百口無一間語擇師友躬課諸子學問以  
故諸子暨孫無不有成業者癸卯憲副君舉於



鄉甲辰對 大廷賜進士出身尋授戶部主事  
未幾 九廟成詔封公如子官安人封太安人  
憲副君奉 命監允蘓松便道省拜堂下公及  
安人則首以清忠訓之曰吾不榮爾封而榮爾  
能其官也君受教惟謹主事公銀章鷺綵優游  
里中者許年卒憲副君以主事公憂歸服闋復  
除戶部主事值南方用兵 詔擇才力之臣使  
監募軍乃推君河南僉事以往僉憲非員外郎  
中不授而授主事才之也有頃以冗裁家居二

年餘色養安人不復置念仕進甲寅忽 詔起  
官湖廣僉憲而所蒞道乃在最西南陬君不欲  
遠其親具疏乞罷力止之君在湖憲者五年安  
人亦無他於是歷陞浙江布政司叅議陝西按  
察副使所至有治績謙謙語若不出諸口而值  
事當大獄勁若太阿不可撓此亦其教素閑若  
此也初憲副君歸自浙也屬太安人病脾乃為  
君強起坐如平時君察其有異復具疏欲上之  
安人曲辭不聽既乃大言君曰若不見胡副使



事乎秋防務重徒戀不急赴設有聞 上怒悔  
 晚矣吾可當此變不耶第促往吾心寬即病起  
 有日矣君乃涕泣往今君深引以為已責夫仕  
 宦者誰則願爾然莫可如何則亦毋庸徒自苦  
 責為矣安人生於弘治己酉五月六日得壽七  
 十有四歲葬以今年十一月二十有二日主事  
 公有子四人曰錦曰鈐曰鋌安人出曰鉏側室  
 高氏出安人始生子多弗育乃為公卜娶高既  
 娶高而安人有子三子又貴人亦以是頌之女

二人孫男九人若汶若水若洙若泗若沂若濱  
 若澄若沛若瀛孫女八人銘曰維德與年生封  
 死安有樂斯室詩不云乎有如皦日莫不願畢  
 而奚以戚

明故誥封夫人趙母張氏墓誌銘

夫人張氏濟寧衛右所千戶張公乾女也母宜  
 人展氏寔生夫人夫人生有淑質穎慧諸女儕  
 莫及即一言笑不易宗黨咸稱其貞靜焉衛指  
 揮僉事趙公祿有令子卿今都督公也少而英



異材志絕人指揮公方為擇配卜無如張氏女者乃字夫人及適都督公其宜厥家都督公折節讀書夫人時勗之有頃指揮公以事當調衛卒嘉靖三年都督公嗣襲山海衛指揮僉事十五年公自指揮僉事歷仕至保定副總兵屢典禁軍進都督夫人咸與偕公聲實騰茂所至有名功在金石然廉潔無染海內士夫識與不識無不推轂焉者公既一意循國未嘗問家有無而家政又肅以有夫人在罔內顧也二十年公

坐謗書逮 詔獄夫人携諸子女僦居京師囊無餘錢自力作為公給舖糗綴衣襦教仲子理冤狀 闕下時朝論已多右公恨不一朝雪其枉會忌者又不當事事乃大白有 詔立出公尋復其官復以都督點禁軍未幾再掛將軍印鎮宣府大同夫人如例稱夫人焉公以戰勛當進秩累爵矣然在邊庭久覩時事多牽制仕非其志上書乞骸骨不報乃又累疏病免歸山海衛三十六年上書乞歸濟就先人墓所許之遂



携夫人居濟未幾夫人遘疾今年二月十七日  
竟以不起距其生之弘治辛酉迨今壽六十有  
二耳嗚呼哀哉今南北多金革之務 聖主拊  
髀思用舊將而都督公益健善神采若三四十  
歲人譽望不在充國定遠下即驚舉有日舉之  
日即提劍出故廬又一意循國如前設內顧恃  
誰在也是可哀已夫人有子三人曰完壁聯壁  
崇壁完壁聯壁早世崇壁即嗣子緝學攻藝力  
行古道能世公業者也夫人始寢疾至於屬纊

而嗣子躬調湯藥日夜坐卧榻下數年蓋歸室  
者無幾今摧毀殆不能支雖其性能非有庭誨  
何由哉予旣甚戚之不得以不文辭矧予姻也  
而又奚辭於是乃誌夫人且銘諸壙銘曰貴以  
夫貴名以夫名而女德在躬相夫以成則豈徒  
榮坎斯封斯維永其寧

奉政大夫直隸河間府同知隅菴張君墓

誌銘

君諱天愛字季仁父易軒翁希哲祖翰曾祖純



高祖玘距君凡五世咸家山東為鉅野縣人其上莫可論次而世隱未嘗通籍君有兄曰天錫天福天錫始讀書為儒應選貢君之子曰以直從子曰以蒙皆能世君業充縣學生於是張氏之門儒雅宏飭蔚蔚稱文矣君偉幹脩髯動有儀矩語默以時十四歲而遊縣學每試學臺輒高等授廩上庠君既穎慧而緝學益力學者多宗師之天性孝友事易軒翁及母王氏能怡其志處二兄敬而有恩家百口同爨無間語咸君

內政有以經緯綿密之也人以其難嘉靖庚子舉於鄉凡幾上春官不第易軒翁強之仕乃仕丙辰謁選吏部除河間府通判實主糧儲君纔起家書生即親錢穀而能催科發歛公無匱憂私無苛苦稱舉職焉時三殿工起奉檄採石石窩草食露處與匠卒同其苦以襄大役有頃宣大告急上命大司馬少保楊公往督諸軍公舉君自隨理行營儲餉君設法轉輸知畧輻輳百應不失即倉卒亦立辦大司馬以為能



邊糧實弊數主者往往溺之君一一條除不遺  
織垢至今遵其格而操履矚然人亦莫得而染  
久之論功有 詔優賞予金大司馬復疏其賢  
曰一廉如水百廢俱興張通判有焉蓋名言也  
吏部亦以君獨勞調停之辛酉遷河間府同知  
君還內治大守荆南葛君雅好君郡政有疑輒  
相可否之出攝滄州事滄州事煩民弊幾不可  
為理君以節縮均卹為念不數月而瀕河州縣  
稱治者乃首滄州君亦以是悴損邁疾弗起矣

嗟嗟惜哉君寢疾葛守往視君解中蕭然無羸  
物覆體一布被尚多補綴且囑葛曰脫見念為  
某治棺當廉其值值弗廉弗能償也乃葛守願  
為備其事甚治曰吾友道然爾城中居人士民  
無大小輟其事而致哀於君謂天胡奪我仁父  
也維時甲子二月二十九日距其生之正德己  
巳五月二十七日得壽五十有六歲配王氏生  
以直其他載諸誌茲弗表表其大若此以直扶  
柩還塋其故墟而葛君實誌其墓祭法以死勤



事則祀之禮鄉先生沒祭於社君官河間九年  
剗煩茹辛至於捐體其在家政合同聯異不肅  
而成經學孝義教行業著有舉之血食於官尸  
祝於社謂弗允哉謂弗允哉系曰窮經飭行士  
之珍也抱珍弗售嘅靡因也薄言售之艾而屯  
也艾也其年流芳愈延屯也其官流澤靡殫士  
慕者芳彼積徒山民沾者澤彼行徒軒既芳以  
澤為蕙為蓀通乎斯川塞乎斯淵其在先生曷  
虧曷完盍瞻爾後有穀縣縣在今一被在昔五

襦舍無留犢釜有生魚於維渤解龔豈專譽永  
言吏則樂只君與生而鳴玉象笏華裾沒焉樹  
石圓頂方趺 賜金有爛 皇典照衢元臣舉  
最 王庭屢敷先生於此屯與亨與豐碑允副  
辱與榮與

明故奉政大夫南京戶部河南清吏司郎  
中西嶼董君配安人徐氏合塋墓誌銘

君以嘉靖戊午二月二十九日卒已未二月二  
十六日塋郡城西南祖塋安人後君四十有一



月而卒是為辛酉五月以其年月日祔於君合  
塋焉適子楠追述君平生乞言于吏部員外郎  
竹亭張君為狀於世而又自狀安人之行以今  
年正月走謁予京師請銘按君諱汝瀚字子涯  
與安人俱青州益都人四世祖曰奉奉生翔翔  
生彛彛生魁即傑菴公配劉氏寔生君君兄弟  
四人董氏世治星曆堪輿之學而未有聞於當  
世君數歲乃慕儒術教之儒即誦書日記千餘  
言甫長遭傑菴公喪喪之如成人服除復緝學

益力當是時山東言春秋者有青州曹給事公  
見君文深器異之以其經授君君乃盡得曹氏  
學而復以其學授諸生至今青州言春秋者多  
出董氏於是西士聞西嶼先生名輒慕嚮之甲  
午舉於鄉乙未試進士不中遊大學師事司成  
涇野呂先生士集六館者以千數君與同縣石  
君琚數試數高第戊戌卒業歸侍母劉劉病君  
迎醫調湯藥日夜衣不解劉卒君哭毀無時里  
巷哀焉甲辰復試春官不中乃謁選吏部授南



直隸建平知縣始至即歲不登君一以節縮寬恤為主悉除諸煩苛擾民者民乃生既乃為民築石隄而蓄洩水利得田萬三千餘畝民名其塍曰董公圩巨猾宗挾富結貴人而凌轢柔善縣官多首鼠浮與之不則為所中按寘之法君為政務從簡厚而諸弊莫從生顧見義明決初不為依阿態以媚上官諸上官每品其屬首曰董知縣董知縣云在事七年薦獎者四十餘數語皆當實不溢辛亥春陞大僕寺寺丞庚戌比

虜內侵有議倍征民馬民病之君奏減三分之一而騎用亦饒奉命市馬遼東立驗馬式革宿弊還印直隸山東馬亦用簡直得譽甲寅六月以治績予勅褒美之傑菴公贈如其官劉氏贈太安人而徐亦封安人尋陞南京戶部福建清史司員外郎乙卯監天策諸倉丙辰催鈔淮關咸有政便軍民而鈔稅顧倍是年陞本部河南司郎中兼攝江西川貴諸司事事多而益辦尚書公甚才之然尚多暇日則出遊諸名勝賦



詩若未嘗為吏者居久之鬱鬱思東土遂移病  
乞歸待報數月 命始下已舟出淮即具朝服  
北嚮叩頭祝焉乃發十月抵家君官凡四徙安  
人咸從治所君性剛果而才又充遂安人則從  
中婉諭之終其官未嘗以剛害於事者亦安人  
力也安人祖弼仁至福建布政司叅議父經驛  
丞有叅議風安人既名家子而又知學以故陰  
教甚閑佐夫君發跡立朝所在有令聞而內政  
益修其事劉安人最得其志處叔母徐暨諸姊

姒子姓下建僕御媵婢和平有風教可傳劉安  
人季子早亡有遺孤椿意甚憐之君及安人撫  
教與楠同為縣學生以下慰安人君歸青四閱  
月而疾作卒安人悲不欲獨生以是年寢疾閱  
三歲餘亦卒君距其生之弘治丁巳安人距其  
生之弘治庚申俱得壽六十二歲君少時志操  
甚峻謂遠大可立致然竟以不第為弗遇乃其  
蒞官勵行皆自謂無憾以至蓋棺而保完名君  
而有知其亦自謂未始弗遇也哉有子二人楠



安人李氏出某妾丘氏出妾劉者有女一而無  
子楠有文知書法試中禮部儒士孫女三人銘  
曰士繇文振吏以才舉君也儒師文孰與伍既  
宰百里有謚甚良惠曰父母而威神明為天  
子牧閑政以肅雲錦開闔碩蕃且育再陟戶曹  
出納蓋藏以莫不穀既治於庖亦善尸祝登高  
能賦大夫之淑人吏而家君鑒其足曰歸曰歸  
我憶先人冠蓋奕如省其墓墳於斯踟躕於斯  
宴語君亦首丘於斯泉處泉深壤高穹窿其宇

過者式之豐碑嶠岨懿哉徐媛夫君是恫恐後  
其亾今也則從鸞栖豈單蕙隕猶叢托魄則然  
神遊曷窮翳翳宰木宿草芊芊予哭莫建而言  
則傳載銘玄石終古閱焉

明故中憲大夫弟子魯墓誌銘

君生於正德丙子卒於嘉靖甲子壽四十九耳  
嗚呼痛哉惜已惜已吾不意吾乃目視吾弟之  
死吾父中憲公今年八十有四而目視其壯子  
之死而二孤者又昧弱未成立也若君者何以



死哉何以死哉嗚呼吾乃忍銘君君諱學曾字子魯生而英敏七歲能匹句客有試者無難易輒應聲酌之十三而屬文出奇語老成者嘆不及也丁酉舉於鄉甲辰第進士未幾疏病歸戊申起授潁州知州辛亥遷山西平陽府同知壬子丁先母恭人憂乙卯復除鳳陽府同知尋擢知鳳陽已未以禦倭功擢山西按察司副使兵備岢嵐君有心計讀書不務記誦以超悟獨見為旨即醫射音樂奕象咸妙解出人意料談言

唯玄理則抽 訓忘倦視世務蛻如爾故其為政一以寬簡從事曰民樂吾寬吾樂吾簡足矣岢嵐時遭不年邊備益大弛君極力經畧塞卒至煮榆皮柳葉啖白土而無叛者以君在故有事忤御史君急持不肯下吾馳書諭之君曰吾獨非憲臣且安所置黃紙哉竟不肯下御史御史乃劾奏吏部覆議調君官而詞旨實右君君拂衣還卧里中日侍我中憲公願其志築僻園自謂終焉然君以剛毅卓邁既多自負而見銅清



時又橫罹口語氣益鬱鬱不得吐乃竟以是死  
嗟乎天乎吾誰之尤二孤者曰霍曰雱吾將維  
持之然吾衰慮不克副益悲苦矣銘曰嗚呼君  
也天旣才而又抑之以阨其身也後吾而生先  
吾而死胡互乎云也君也奚之而吾猶然其獨  
存也有耄在室有稚在庭有娶在室胡釋此而  
孰與鄰北原有阡而撫其土而甘其泉昔在壬  
子君有妻孟實先厝焉君嘗謂茲丘之形鳳凰  
翩翩我往祖之負岡抱渚左右翼然今者卜吉

四月廿五從君初言民莫不穀君獨罹灾親賓  
具在君往弗來白日畢照君也潜埋轎車空返  
嗚呼玄臺

誥封中憲大夫吉安府知府先考合葬墓誌

公寢疾不肖孤跪床下受遺令曰後事百從約  
慎勿令世儒文我為也孤旣不敢背第念公負  
才志間世不遭功名之運泯焉同庶衆以歿又  
不一言以藏諸窆孤安能忍按靳氏世家齊寧



預備倉碑有靳克已克皇者元至正間人族衆  
所收戶部民田曰靳景珪者洪武三年人又有  
稱五公者皆莫知為何宗出所可知者孤高祖  
文祥公麟生廷謙公禮禮生宗鳴公鏗鏗寔生  
公公諱顯字孔彰生而警捷材武絕倫十五歲  
為父報仇拒豪公子於市手格之一市人莫敢  
近豪大屈服乃釋既冠娶先恭人田氏始折節  
為禮容益壯遊京師客淮海應詔入賞拜散  
官諸散官見有司輒奴驅使之又數撻叱公至

顧改容禮即盛怒公徐出一言無不解者州有  
大役官僚皆走匿民邸中公挺身出方畧得濟  
者數四而公又無折損苦人以是服其能正德  
癸酉生學頽丙子生學曾咸教之儒嘉靖乙未  
頽舉進士丁酉謁告歸築居城北之相里有地  
曰鳳凰灣公自號鳳灣由此甲辰曾舉進士已  
酉以頽官滿有詔封公江西吉安府知府母  
恭人壬子先恭人卒庚申曾以山西按察司副  
使罷歸甲子曾亦卒公哭之慟焉踰月遂遘疾



先是孤以山西右布政使乞罷未幾又以陝西左布政使乞罷皆不報至是復力陳父老且病萬無棄去不養理疏又四上始蒙恩許解見任許矣而公已邁疾曾不一日承歡而優游以卒歲也嗚呼痛哉傷心尚可言乎公平生未嘗疾痛夙興夜寐亦未嘗有寒暑之侵家絕巫卜疾亦不肯飲藥醫至輒困以所難喻醫乃袖手去自奉世甚儉非其有一介不妄取起家特手不持一錢晚年貲累千金地萬餘畝屋千間地率

碯鹵下澤沮濡之鄉人所棄者公賤值而墾之且墾且買且曰十年期一熟一熟即大償惜乎公志未酬而疾作疾甫半歲而地蕪穢過半人有攘奪者矣貲多軋沒矣屋荒落租不入矣追呼者囂於門矣不肖孤曾不能強力爭即爭何能為固自知才畧非公萬分一耳此固可以識公也公凡所綜畫皆自出心力不假一僕事集如蝟不踰畧而酌之人筭利害率反覆公一謀即決即居其利未嘗學書而諸瑣務皆手自紀



載點畫端朗談議設策皆暗合古法殆神異非  
恒品人也雄視莫肯下物至教孤等則一以謙  
遜為旨處骨肉初不為兒女態而匡飭振恤一  
不使失所每言及先太父母輒泣數行下且語  
孤曰若等有名位於清時汝太父力也則又輒  
言太父陰德事數種邇時海內多金革之務孤  
兄弟嘗言於坐中相難不能決則以質公公第  
曰非吾事又未嘗親之何從言也若等即言勝  
亦未必中爾孤兄弟乃相嘆以為真用世名言

語曰千人英萬人傑謂我公也英傑非哉固知  
世未嘗乏材材亦不盡用於世今所謂材科目  
間人也往先恭人卒也有太子少保兵部尚書  
樊公銘其墓公遺令以今年四月四日啟壙合  
葬焉期迫矣故聊述其槩若此方琢貞珉俟名  
筆為表傳令勒諸墓道令天下後世知有我公  
於是孤言為不佞也公生於成化辛丑卒於嘉  
靖乙丑壽八十有五歲子男二人學顏學曾女  
二人皆恭人出孫男五人需雷雯暨女二人顏



出霍雱曾出曾孫男一人于衮需出

表  
贈御史王公配贈孺人李氏劉氏合葬墓

隆慶元年冬十二月有 詔贈故處士王信文  
林郎山西道監察御史妻李贈孺人繼劉封太  
孺人信即公原籍山東平度州人字守忠始祖  
某從軍隸濟寧衛生高祖榮榮生寧寧生五子  
曰宣者始家於濟寧州餘悉居平度勿徙如故  
宣配唐氏以成化乙未二月初八日生公次生

曰閏閏早世公先娶郡人李智女事其孀姑唐  
殊孝愛家人內外咸贊其盛生男曰漢曰滄以  
正德辛未七月卒公乃再娶於劉劉故名門有  
懿範生子曰湘曰江曰洧湘即竹陽君舉嘉靖  
乙丑進士改翰林院庶吉士再踰年授山西道  
監察御史公及兩孺人之貴皆自湘貴推之也  
公少時業儒無以為養遂棄去力作轉販已家  
用乃裕唐天人甚安適之唐寢疾及彌留殯公  
調視哀毀無節感動里閭族叔鑑者嘗屢暴公



公委狗終無以加於公鑑歿公乃治為後事特厚轉販時有太倉某商以錢數百緡來易銀而自悞下其筭當折錢萬計商殊不覺去公復握筭覈之曰商悞矣寧堪幾折耶急躡歸之商乃寤至感泣其諸與人解難捐身好義不校大率類此然以少儒也故終身好弄書筴尤精曆術陰陽之學劉孺人者佐公內政尤力益得唐夫人歡唐歿時曰吾無以過人吾一兒而兩賢婦吾有後必矣言之後幾年而御史湘生嘉靖辛

亥八月二十日公歿距其生得壽七十有七劉孺人既歿公如禮乃益飭其內政督諸子孫男女各力乃業敦尚行義視前子無異已出前子亦各自以為親母不啻也尤加意於諸子孫讀書者必手治膏燼果舖日雞鳴至半夜嘗以其身先後之故湘卒成名洵緝學待時竟大王氏孺人有力焉二年予自太僕召改光祿卿與竹陽君同立朝慕竹陽君內精理而外示冲退反之躬未易學也屬貴州巡按任滿當代上命



御史湘往予聞之走白御史大夫王公曰湘母  
老柰何使懸慮萬里大夫曰次及則及之吾亦  
無如湘何也斯蓋他人百計預為言者而竹陽  
君曾不言及悶悶焉往過里則孺人者故示強  
食健善以慰於君時促之束裝且曰若不速詣  
代不念彼當代者獨無父母乎君不得已屑涕  
往受代顧獨念孺人不置至病始上書歸抵  
家而孺人亦已病有時相見欷歔久之乃母子  
完好矣謂神明啟祐之非虛哉今年八月孺人

邁疾竹陽君日夜侍匪懈孺人念洵一見九月  
二日洵下第至歷下七日乃屬續孺人生於弘  
治庚戌十月二十七日至於卒享年八十一歲  
子五長漢義官娶趙慶女繼娶秦鎮女次滄後  
公三年卒娶蕭貫女次湘即御史君娶姜繁女  
繼娶庠生宋信女次江武學生娶蔡子明女繼  
娶扈思忠女次洵郡廩生娶鄉耆白燦女女一  
適李英子豹孫男八女七用楫娶聶貫女漢出  
用梅娶姜侃女女適劉朝用子汝松俱滄出用



霖郡庠生娶庠生劉焯女用極聘給事中劉不  
息女用裴幼俱湘出用杰聘庠生楊浹女女適  
義官程釗子道亨次許聘儒士張問達子賀俱  
江出用材聘典膳李銅女用楨幼女許聘府同  
知趙至子寵次許聘官生靳需子于衮次許聘  
知縣郭汝子一樞次一幼俱洧出曾孫男女共  
五人用楫者女三用梅者男二煥燿往公之歿  
竹陽時為諸生塋未有表為歎及時將以啟壙  
以孺人合塋禮焉遂走幣狀詣都下以表見屬

且曰孤先公孺人有善若此孤之歿又不忍文  
非公其孰憫焉予乃為表之在法宜銘其壙在  
濟寧城西少汴陵陽村之原塋以是年十二月  
十三日銘曰茲惟幽墟誰秘其光而舒耀發祥  
而輪蓋交翔而駿奔鏘鏘曰掩三靈作瑞斯邦  
士繇一介以亢厥宗矧也條支縣縣嗣慶岡如  
宰如神圉攸憑豈埃銘章

楊公愛軒墓誌銘

公諱思仁字尚德世家濟寧州生於弘治十年



閏十一月十一日卒於隆慶元年六月十二日  
得壽七十苑以是年九月十九日楊氏有舊壘  
在州城南曰郗江原者葬其先動之君以上五  
世兆域且盡公有弟曰思義字尚宜先一歲而  
卒乃卜塋於新牖之灣自為一祖至是公之子  
又卜於城北三里營葬公又自為一祖凡葬皆  
先立祖祖無兩者濟葬法率然也楊既茂祖族  
而子姓又繁若此固宜公蚤嘗學問有至性事  
其父母愛慕之至終身篤行約已一依於厚自

內庭以達閭黨未嘗有一忤語亦不妄與人嬉  
譁晚歲益豐於財盡其息布諸子為賓師筆劄  
費雅善施與有田在班村歲饑舉村賑之令其  
人猶見德君友愛尚宜不啻如其父在時尚宜  
亦愛而敬之如其父而兩房之子又交相愛敬  
如一父出也公之子九人曰江潮澄湛河溢濂  
汲溥尚宜之子四人曰浹沆海洪咸使業儒治  
一經一門之內巾舄鱗比弦誦相聞德相勸業  
相勗郡省之間尚有他茂族而如匹者固無兩



然興起而督植之者實自公始云公嘗輸賞知  
印歷事冠帶矣而不肯仕也貨殖之家仰有取  
俯有拾孰能為祿且舍之而推而弗就又孰能  
有子十十五五盡約之儒以責旦夕不可必之  
效此誠有踔識獨慮難可與時流者語哉公娶  
於張為知縣玆女側室二咸有出女二人男九  
人江出以旂伴姐潮出以文以名以善澄出文  
衡文範四姐閨姐湛出遇春河出倍姐濫出以  
功銘曰謂公是耶弗祿以官謂弗是耶故我而

冠猜水成闕蛟龍生馬有士如林為世璵璠仕  
乎弗仕孰敢輕軒嗟才非難植德為難德也昌  
後若往而還根深幹偉基厚壟堅荀龍表漢竇  
桂蕃燕蓋不以彙而以其賢維愛與敬匪人而  
天楊氏之興豈必貨泉沃野維赤肇闢華阡公  
乎以歸送者嘆言豈不仕儀五鼎旋頒成此玄  
銘有待 皇綸

隱君正軒楊公墓表

君以嘉靖乙丑冬十一月十七日卒葬以丙寅



春二月有子曰浹曰沆曰海曰洪浹沆皆郡學生既襄事則相視泣曰吾大夫者善足於有位矣乃無階而位而又壽未躋中以黯然幽壤也此吾諸子中幸一階而位以徼榮於地下焉河清可俟乎聞諸墓有誌有表誌諸陰表諸陽庶幾吾大人有善不與夫黯然者同幽也諸子合詞曰然於斯是索言於僕甚懇以固僕謝絕鉛槧者十餘年而諸子見索者殆踰四年於斯是乃撫望雲先主誌中語而表其大者於其石君諱思

義字尚宜生於王德戊辰距其卒享年五十有八曾太父景高太父鸞父震字動之稱動之府君云世以右族著里中配牛氏生兩男曰思仁字尚德者君兄次即君君十歲而牛卒喪之如成人禮焉繼母陳又安君之孝無間於所生君既長娶於徐相敬如賓久之徐邁疾乃置立側室王氏府君嘗病不食君亦不食復常乃復常既府君寢疾君與兄日夜侍至萎悴不替如是者踰三月府君卒君哀毀幾不起徐歿時君尚



壯顧獨念徐乃不貳醮君家自動之以來益以  
貴著再傳而兄尚德恢其業君少兄幾許而父  
事兄以至白首且歿諸務無大小出入言語一  
以兄是從尚德亦篤愛之不啻其手體尚德有  
子十人為郡學生者六餘子與君餘子無一暇  
逸者亦皆兢兢儒業此十四人者自相師友切  
劘同舍不窺外戶歲時自拜其家庭外唯揖官  
府謁學宮禮祠墓始一出出則大者鴈行小者  
魚貫衣帶襜如巾烏襪皆不假擯相于人間諸

生相逢一座語間此經彼史言古則古言時則  
時諸生多傾心下之此郡之人皆多君兄弟之  
能教其子也向使君兄弟有一違言則其家不  
益家益矣有一見利而不務遠計則其子不盡  
向學若是君卒君之兄慟甚踰年亦卒予銘其  
塋時亦語多及君君之誌又曰君性行寬重內  
剛外和寡言笑不事嬉遊世間一切機竅籠絡  
之態非獨耻而不為亦天性所不能為又敬其  
二姊亦如其兄而振其貧舉其後事以扶植其



孤至於睦隣讓衆雖侵暴不校皆其性然其不  
為之隱君子與諸子力學守道正應世需為君  
耀隱發潛光大日固有不俟予言而揭之以  
日月者在也其諸子息姻婭世閱諸事一見諸  
誌語多不載

靳兩城先生集卷之十八



孤至於睦隣讓衆雖侵暴不校其性然其不  
為之隱君子與諸子力學守道正應世需為君  
耀隱發潛光大有日固有不俟予言而揭之以  
日月者在也其諸子息姻婭世閱諸事一見諸  
誌語多不載

靳兩城先生集卷之十八



